

Vun driweriwer

erscheint auf www.lenauheim.de

monatliche
Erscheinung

September 2018

von Helen Alba

„Mir sin wieder hem kumm!“ - „Schwabenliesel“ un „Schwalbenmütterchen“ in Lenauheim

Die Heimatortsgemeinschaft, die Gemeindeverwaltung un die römisch-katholisch Kerch Lenauheim han anfangs September 2018 zum achte Mol zu de Feschttäch „Kinder des Dorfes“ in die Heideortschaft Lenauheim ingelad. Es is schun e langjährichi Tradition, dass die Lenauheimer vun nah un fern jedes zweiti Johr des Fesch mit de jetziche Ortsbewohner feire.

„Mir sin wieder hem kumm“, saat Peter Minnich, der mit seiner Schwester jedes Mol derbei war. „Weil mer immer wenicher were, is es doch scheen, dass mir, die noch kumme kenne, uns do treffe un scheeni Täch mitnaner erlewe. Des Erlebti verzähle mer dann weiter an unser Landsleit, die in Deutschland lewe“! Steirisch un schwowisch getanzt

Wie immer war die Organisation tadellos, es hat an nix gfehl un sowohl Teilnehmer als ach die Gäscht han sich gut gfielt. Angereist war e Delegation aus der Verbandsgemeinde Kirn-Land/Deutschland, mit der Lenauheim e Partnerschaft gschloss hat. Erschtmols beim Fesch derbei war e Tanzgruppe der Arbeitsgemeinschaft/ARGE Volkstanz Steiermark. De Tanzgruppenleiter Fritz Holzmann git Auskunft, wie es zur Fesch-Teilnahme kumm is: „ Vor fascht 25 Johr sin ich erschtmols ins Banat, uf Lenauheim kumm. Selmols han mer dorch die Südsteirische Rumänienhilfe, Obmann Helmuth Kahr, do es Dischpensar umgebaut un uns es Infiehere der Wasserleitung vorghol, was dann ach gschieht is. Jetz sin mer mit eener Volkstanzgruppe bei de Feschttäch, alli Mitglieder sin begeischtert. Die ARGE is ke Verein, es is e eigenständichi Gemeinschaft, sie bsteht aus einzelne Persone aus der Steiermark“.

Die Tanzgruppe „Edelweiß“ aus Detta war ach in Lenauheim. Werner Griebel, Vorsitzender der HOG Lenauheim, saat: „Die Gruppe aus Detta han uns mit ihrer Teilnahme am Fesch die Ehr angetun. Beim Gang zur Kerch ware se sehr ordentlich un gewissenhaft. Ihre Trachte sin scheen, die Tanzvorfiehunge wunnerbar. Die Leiter der Gruppe, die Familie Samantu, aso so was vun heeflich! Sie han alles super organisiert, alles is reiwungslos abgeloff. Uf dem Wech will ich der Gruppe nochmols e großes Lob ausspreche“!

Die Jugendgruppe „Edelweiß“ hat de bekannte un beliebte Bännertanz vorgfiehr. Außerdem de „Stolz-Tanz“, „Schwabenliesel“, die „Kreizpolka“, „Mein Banaterland“, „Veilchenblaue Augen“ un de „Kathiländler“. Die „Edelweiß“-Seniore in Bakoware Weiwer-Trachte han vorgfiehr: „Urlauber-Polka“ un de „Schwalbenmütterchen-Walzer“.

Heimatspflege werd groß gschrieb - Werner Griebel betont: „Mir, die mer jetz in Deutschland lewe, kenne zum wiederholte Mol noh unsrer Aussiedlung do in unsrem Heimatort gemeinsam mit de heitiche Bürger der Ortschaft un de Ehregäscht scheeni Stunde verbringe un Pläne for die Zukunft schmiede. Ich meeht an es Gedicht `Das Wiedersehen` vun Nikolaus Lenau erinnre: `Du heimatliches Tal, mir werd so wohl und wehe. Dass ich dich nun einmal, Ersehntes, wiedersehe`! Die HOG, es Bürgermeisteramt Lenauheim, mir plädiere for Kultur, Völkerverständichung un Heimatspflege. Un des meehte mer heit un do während unsrem gemeinsame Fesch zum Ausdruck bringe“.

Kevin Back is 25 Johr alt. In Deutschland gebor hat er mit seiner Familie nor schwowisch gered. For ihne bedeit Lenauheim, vun wu sei Eltre un Großeltre ausgewannert sin, ganz vill. Er kummt oft un gheere her un is derzeit Mitglied im Vorstand der HOG. Kevin studiert in Freiburg Geschichte un verrot: „Iwerhauptscht vun der rumänischi Geschichte will ich je meh erfahre. Während des Studiums han ich ach rumänisch rede gelernt. Des han ich mer vorghol, weil bei uns in der Familie han mei Eltre nor dann rumänisch gered, wann ich nit heere han selle, was se mitnaner pischpre. Des is jetz abkumm“.

Un ich will unbedingt anfiehere, wie die Teilnehmer un Gäscht während der Feschttäch traktiert gin sin. Weil es Lenauheimer Kulturheim in Reparatur is, is es Mittachesse an dene zwaa Feiertäch im Grawatzer Wertshaus ufgetraa gin. Grawatz is jo nor e Katzesprung vun Lenauheim entfernt un de Richter Ilie Suci is eigentlich e Grawatzer (Grawatz un Bogarosch gheere zur Gemeinde Lenauheim). Natierlich ware alli begeischtert vun dem gute Esse. Samschtachs hats e sauri Supp gin, dernoh Schweine- un Lammpapriksch mit Nudle un Saurem, hinenoh Kranzkuche. Die Nudelsuppe, Bradl un Salat mit Nohtisch Äpplitta sin am Sunntach ufgetischt wore.

Zum gute Geling der Veranstaltung kann mer nor gratuliere!